

Ismi jismiga munosib bu qiz Nafosatxon Tojiboyeva Termiz shahridagi 19-ixtisoslashtirilgan maktab-internatining 9-sinf o'quvchisi. U 5 yoshidan qo'shiq va kuyga oshufta. Sevgan musiqa asbobi – dutorda «Qizlar guldastasi», «Qo'shdutor», «Dilxiroj», «Qari navo» kuylarini maromiga yetkazib chaladi. Nafosatxon Termiz shahrining 2500 yilligi tantanasida o'zining «Barchinoy yori» qo'shig'i bilan qatnashgan.

Nafosatxon haqida 8-betda o'qiysiz.



2008-yil
25-fevral
N:9
(66654)



Gazeta 1929-yil 1-avgustdan chiqa boshlagan

Kimyo fanidan o'quvchilarning 42-Xalqaro Mendeleyev olimpiadasi Toshkent shahrida o'tkaziladi



Ayni paytda o'quv maskanlarida kimyo oyligi, viktorina va bellashuvlar boshlab yuborildi, jumladan, Uchtepa tumanidagi 197-maktabda «Mart oyi – kimyo oyligi», deb e'lon qilindi.

Bu haqdagi maqolani keyingi sonda o'qiysiz.

BUGUNGI SONDA:

2 -betda:

Kutubxonam – kutib qolma

3 -betda:

Qalbim poklik dunyosida yashaydi

5 -betda:

Kitobmi yo kompyuter?

JAJJI CHEMPION

Poytaxtimizdagi 75-umumta'lim maktabining 1-sinf o'quvchisi Ortiq NE'MATOV shaxmat bo'yicha 10 yoshgacha bo'lgan bolalar o'rtasida o'tkazilgan mamlakat birinchiligida g'olib chiqib, O'zbekiston chempioni bo'ldi. Biz seni qutlaymiz, jajji CHEMPION!

NAMUNALI MAKTAB

Maktabimizda «Siz tarixni bilasizmi?», «O'zbekiston, seni tanidi jahon» mavzularida devoriy gazetalar tanlovi bo'lib o'tdi. Tanlovda g'olib chiqqan 8-«A» hamda 8-«V» sinf o'quvchilari maktab ma'muriyati tomonidan esdalik sovg'alari bilan taqdirlanishdi. Shuningdek, bizning maktab eng namunali maktab deb topildi.

Mansurbek SOBITOV,
Toshkent shahridagi

169-maktabning 8-«G» sinf o'quvchisi

SIZNING FIKRINGIZ

Salom qadrligiz gazetam «Tong yulduzi»!

Men Hilol qishlog'idagi 5-o'rta maktabda o'qiyman. Sinfimiz bilan gazetaga obuna bo'lganmiz. Har bir sonini qiziqib o'qiymiz. Undagi maqola va she'rlar bizni befarq qoldirmaydi.

O'quvchilar kompyuter o'yinlariga berilib ketganlaridan hatto darslarga qatnashishni ham unutib qo'yyaptilar.

Menimcha, bu o'yinlardan ko'ra ko'proq kitob o'qishga e'tiborlarini qaratsalar, maqsadga muvofiq bo'lardi.

Feruzaxon SHODIYEVA,
Qashqadaryo viloyati, Qarshi tumanidagi 5-maktabning 9-sinf o'quvchisi

(Tengdoshlaringizning bu xususdagi fikrlari bilan qiziqsangiz, 5-betga qarang.)

NAZM VA NAVO

Ulug' mutafakkir Alisher Navoiy tavalud ayyomi arafasida Toshkent bank kollejida ham «Nazm va navo kechasi» nomli tadbir bo'lib o'tdi. Kechada kollej direktori Z.Xudoyberdiyev o'z fikr-mulohazalari bilan o'rtoqlashdi. Shuningdek, tadbir sahna ko'rinishlari, qo'shiq va g'azallar bilan yig'ilganlarga xushkayfiyat bag'ishladi.

Umida HAKIMOVA,
kollejning ona tili va adabiyot o'qituvchisi

BOBURNI XOTIRLAB

Shayxontohur tumanidagi 59-maktabda Boburning 525 yillik tavalludiga bag'ishlangan tadbir bo'lib o'tdi. Uch-rashuv shoirming hayoti va ijodi haqida o'quvchilarning ko'proq bilimiga ega bo'lishlariga imkoniyat yaratdi. O'zbekistonda xizmat ko'rsatgan artist Po'lat Nosirovning Boburga bag'ishlangan spektakllardan keltirgan jonli parchalari barchani xushnud etdi.

H.ABDUNAZAR

**Kitoblarning soni emas,
ularning yaxshisi foyda keltiradi.**

**SENEKA,
Rim yozuvchisi**

KUTUBXONAM UTIB QOLMA



A'lobek har kungiday maktabga barvaqt kelib, ma'naviyat xonasiga kirib dars tayyorlay boshladi. Hali darsi boshlanishiga olti soat vaqt bor. Bemalol uy vazifalarini o'qib, yozib olishga ulguradi. Undan tashqari, sevimli «Sariq devni minib» kitobini ham

qayta o'qib chiqishi mumkin.

– *A'lobek, sinfdoshlaringizga o'xshab darslaringiz boshlanguncha uyda dam olib, o'ynab kelsangiz ham bo'ladi-ku. Nega ertalabdan maktabga kelib, dars tayyorlashga tushdingiz? – savol berdik qiziqib.*

– Men tarix, geografiya, matematika fanlariga juda qiziqaman. Uy vazifasini tayyorlab bo'lganimdan keyin kutubxonaga kirib, boshqa adabiyotlarni ham o'qishni yaxshi ko'raman. Bu menga odat bo'lib qolgan. Agar har kuni ertalabdan kutubxonaga kirmasam, nazarimda, kutubxonam meni kutib qoladigandek tuyuladi.

Shu payt xonaga 15-16 yoshlar chamasidagi ikki o'quvchi kirib keldi. Ulardan biri o'zini Diyor Ikromov deb tanishtirdi.

– *Diyor, II-sinf o'quvchilari kutubxonaga juda kam kirar ekanlar. Buning sababi nimada, deb o'ylaysiz?*

Ko'rinishidan og'ir-bosiq ko'ringan Diyor savolimizga javob berishga shoshilmadi. Biroz o'ylab, so'ngra gap boshladi:

– Shaxsan o'zimni oladigan bo'lsak, maktab kutubxonasiga kam kiraman. Bu degani, kitobga e'tiborsizman, degani emas. Chunki uyda mening shaxsiy kutubxonamda 2000-3000 ga yaqin kitoblar bor. Fransuz tili va tarixga qiziqqanim uchun bo'sh vaqtlarimda chet el yozuvchilari Jek London, Martin Iden, Artur Konan Doil asarlarini o'qiyman. Boshqa ma'lumotlarni internet orqali bilib olishga harakat qilaman.

– *Insonning ma'naviy dunyosini boyitishda kitob va kompyuterning o'z o'rnini bor. Nima deb o'ylaysiz, bunda ikkisidan qay biri birlamchi omil bo'lib hisoblanadi?*

– Kitob insonga bitmas-tuganmas ma'naviy ozuqa bera oladi. Kompyuter orqali esa oz fursat ichida dunyo yangiliklaridan xabardor bo'lishingiz mumkin. Menimcha, badiiy kitoblarga inson ma'naviy olamini boyitishda asosiy omil bo'lib hisoblanadi.


O'quvchilar fikrini maktabning ma'naviyat-ma'rifat ishlari bo'yicha direktor o'rinbosari Nozima Hasanova davom ettirdilar:

– Maktabimiz fransuz tiliga ixtisoslashtirilgan bo'lgani uchun, ta'lim rus va o'zbek tillarida olib boriladi. Hozirgi kunda o'quvchilarni majburlab o'qitib bo'lmaydi. Avvalo, ular qalbida darsga mehr uyg'ota olish kerak. Shundaygina

o'quvchi o'z qiziqishlari ortidan kitob ham o'qiydi, darslarini ham vaqtida tayyorlay boshlaydi. Maktab darsliklaridan tashqari, o'quvchilarga badiiy adabiyotlar o'qishlarini tavsiya qilamiz. Lekin «O'tkan kunlar», «Choli qushi» kabi o'lmas asarlar hozirgi kunda yo'qligi meni biroz tashvishlantiradi. Xohlardimki, har xil oldi-qochdi, saviyasiz fantastik va detektiv asarlar o'rnini asrlar davomida o'z qimmatini yo'qotmaydigan o'lmas asarlar to'ldirsin.

Nima bo'lganda ham, shahrimiz markazidagi 51-fransuz tiliga ixtisoslashtirilgan maktabga kirib afsuslanmadik. Chunki bu maktabda A'lobek Salimov va Diyor Ikromovdek kitobsevar o'quvchilarni uchratganimizdan mamnunlik tuyg'usi dilimizni shodlantirdi. Bunday o'quvchilar soni ko'payishini istab, ular bilan xayrlashdik.

ZEBO qiz



ORZU – MENING QANOTIM

Inson borki, orzu qiladi. Orzularsiz yashay olmaydi. Mening ham orzularim ko'p. Bolaligimdan ikki kasb egalarga havas bilan qarayman. Katta bo'lsam, ularga o'xshab el-yurt uchun fidoyi farzand bo'lsam, deymen. Bu kasblar qanday kasb ekan, deysizmi? Ulardan biri jurnalist bo'lsa, ikkinchisi san'atkorlikdir. Nega jurnalistlarga havas qilishimga ham qiziqayotgandirsiz, balki? Nega desangiz, men ko'nglimdagilarni qog'ozga tushirishni yaxshi ko'raman. Biror narsadan ta'sirlansam, bu haqda o'sha kunning o'zidayoq yozib qo'yishga odatlanganman. To'g'ri, ba'zida dars tayyorlayman, kitob o'qiyman. Ammo yozish xayolimdan ketmaydi. Xuddi yozmasam, zerikib qoladigandayman.

Yana, qo'shiq eshitishdan zavqlanaman. Kuy tinglasam, shu kuyi yaratgan bastakorlarga havasim keladi. Axir ijod ham bir mo'jiza. U shunday mo'jizaki, insonning kayfiyatiga ta'sir qiladi, ko'nglini ko'taradi, charchog'ini chiqaradi. Balki shuning uchundir, kuy va musiqaga, san'atga mehrim baland. El sevgan xonandalardan Ozodbek Nazarbekovga havasim keladi. Ularday qo'shiqchi bo'lsam, deymen.

Ikkita kasbni tanlashimga yana bir sabab bor. Yigit kishiga yetmish hunar oz, deydlar. O'zim intilgan manzil tomon tezroq borishga harakat qilib, yaxshi o'qiyapman. O'ylab ko'rsam, orzularim – qanotim ekan. Orzularim menga g'ayrat-shijoat beradi, nasib qilsa, o'sha manzilga yetaman. Albatta, orzularim ushaladi.



Kim bo'lsam ekan?

Mardonbek RAUPOV,

*Toshkent shahar, Hamza tumanidagi
226-maktabning 5-«V» sinf o'quvchisi*

HAMKORLIK MUHIM

Toshkent tumani, «Choshtepa» qishloq fuqarolar yig'ini «Navro'z» mahallasidagi 32-maktabda «Oila, mahalla, maktab konsepsiyasi amalda» mavzusidagi ilmiy-amaliy seminar bo'lib o'tdi. Unda tuman «Mahalla» jamg'armasi, tuman xalq ta'limi bo'limi xodimlari, mahalla faollari ishtirok etdi.

Ayniqsa, Toshkent tumani hokimi, filologiya fanlari doktori, professor Sobir Mirvaliyev mahalla oqsoqoli Mirzoid Mo'minov, xotin-qizlar raisi Yoqut Mo'minova va ota-onalarning ibratli gaplari o'quvchilarga birdek ma'qul bo'ldi.

O'z navbatida, o'quvchilar ham mana shunday ko'rkam, zamonaviy ko'rinishga ega bo'lgan yangi o'quv maskanida faqat a'lo o'qishga, intizomli, har ishda o'mak bo'ladigan inson bo'lishga so'z berdilar.

Muzaffar AHMEDOV



V. Grankin olgan surat

DO'STLIK KECHASI

O'zbekiston Davlat konservatoriyasida «O'zbekiston – Misr do'stlik kechasi» bo'lib o'tdi. Do'stlik kechasida Arab davlatlari orasida mashhur bo'lgan shoir, adib, Misrdagi «Sabahal hayl» jurnalining bosh muharriri Jamol Bixit janoblari mehmon bo'ldi. Tadbirda u kishining vatandoshimiz, «Al Jome Al sahih» hadislar to'plamining muallifi Imom al Buxoriyga atab yozgan «Sahih-ul Buxoriy» qasidasining taqdimoti bo'lib o'tdi.

Do'stlik kechasini Konservatoriya ilmiy-ijodiy ishlar bo'yicha prorektori S.Begmatov tabrik so'zi bilan ochib berdi. Shundan so'ng, Misr Arab Respublikasining O'zbekistondagi elchisi Nadya Kafafiy xonim ikkala davlatning do'stlik rishtalari va hamkorligi uzoq tarixga borib taqalishi haqida to'lqinlanib gapirdi. Misr Arab Respublikasining O'zbekistondagi elchixonasi maslahatchisi doktor Magdi Muhammad Mursiy janoblari esa Buxoro shahridan olgan taassurotlarini so'zlab berdi.

Kuy va qo'shiqlarga ulanib ketgan tadbir dasturi davomida Jamol Bixit tomonidan «Sahih-ul Buxoriy» qasidasi arab tilida o'qilib, Ulug'bek Ochilov jo'rligidagi arabcha kuy ohanglarida ijro etildi.

Konsert dasturidagi Konservatoriyaning iqtidorli talabalari ishtirokidagi kuy va qo'shiqlar yig'ilganlarda katta taassurot qoldirdi.

Nuriddin SIROJIDDINOV

BIR MAKTABNING BOLALARI

*Yangiyo'l tumanidagi 3-maktab o'qituvchisi
Muhayyo To'laganova Ubay Musayev qish-
log'idagi 2-maktabning bir guruh o'quvchilari
bilan suhbatlashdi. Muhayyoning ushbu suhbat
Sizlarga ham manzur bo'ladi, deb o'ylaymiz.*

JONIVORLARGA ACHINAMAN

– Men katta bo'lsam, jurnalist bo'lmoqchiman. Bilaman, jurnalistlar juda ko'p. Ular bilimli, ko'p tilni biladigan ziyoli insonlar bo'lishlari kerak. Men esa televizordan «Hayvonot olamida» ko'rsatuvlarini olib boradigan jurnalist bo'lishni orzu qilaman. Tabiatshunoslik darsini juda yaxshi ko'raman. Ustozimiz Zahro opa Vohidova bizga tabiat, hayvonot olami haqida juda qiziq voqealarni so'zlab beradilar. Uyda Oqtosh degan juda aqlli itim bor. Men ko'p vaqtimni u bilan o'tkazaman. Ba'zi o'quvchilar it, mushuklarning dumiga ip bog'lab, azob beradilar. Qush, ninachi, tillaqo'ng'izlarni tutib, nobud qiladilar. Men shunda jonivorlarga juda achinib ketaman.

MUZAFFARGA YOQQAN KASB

Muzaffar 3-sinfda o'qiydi. Orzusi ichki ishlar xodimi bo'lish.

Otasi Ma'mur aka Ma'diyev militsioner. U o'g'liga juda ko'p qiziq voqealarni so'zlab bergan.

Bu kasb qanchalik qiyin va xatarli bo'lmasin, Muzaffarjon kelajakda militsioner bo'lib, Vatanning chinakam qo'riqchisi bo'lmoqchi.

OLCHA GULLASHINI KUTAMAN

– Menga rassomlik kasbi juda yoqadi. Ayniqsa, ko'klam payti bizning qishlog'imiz bog', ariqlari juda go'zal qiyofaga kiradi. Men olcha gullashini kutaman. Shaftoli avval gullab, keyin barg chiqaradi. Olcha esa buning aksi, avval barg yozadi, boshqa daraxtlardan qolmay, deb duv etib gullaydi. Men ko'klamni juda-juda sog'inaman. Asosan, tabiat manzarasini chizish menga zavq bag'ishlaydi. Odamlarning qalbida doim iliqlik, bahor nafasi sezilib turishini xohlayman, – deydi Akrom Orifxo'jayev.

Muhayyo TO'LAGANOVA

«MEHR
TAYANCHI» BIZGA
SUYANCH

– O'zbekiston bolalar jamg'armasi tomonidan yetim va nogiron bolalarning ijtimoiy himoyasi va bandlegini ta'minlash, ularga ta'lim-tarbiya berish, sog'lig'ini muhofaza qilish borasida qator ishlarni amalga oshiryapmiz. Jumladan, poytaxtimizdagi «Mehr tayanchi» markazi tomonidan bolalarga tibbiy, huquqiy yordam ko'rsatibgina qolmay, ularning hunar o'rganishlariga alohida e'tibor qaratilyapti.

O'quv maskanlarida davra suhbatlari, uchrashuvlar o'tkazypmiz. Ana shunday suhbatlardan biri poytaxtimizning Yakkasaroy tumanidagi 25-maktabda bo'lib o'tdi. Suhbatlardan ma'lum bo'ldiki, o'qishga bormay, ko'cha bolasiga aylangan uch nafar bolani shu maktabga jalb etdik. Bunday voqealar ro'yxatimizda 29 nafar bolani tashkil etib turibdi...

Bundan tashqari, yetim bolalarni qarindoshlari o'z qaramog'iga olganligi ham jamg'armamiz diqqat-e'tiboridadir. Bu kabi oilalarda kamol topayotgan bolalarga g'amxo'rlik qilish maqsadida, O'zbekiston bolalar jamg'armasi «Uyim mening – chirog'im mening!» deb nomlangan dasturni amalga oshirmoqda.

HUNARLI XOR BO'LMAS

Viloyatlarimizda O'zbekiston bolalar jamg'armasi tomonidan YUNISEF homiyligida o'quv ishlab chiqarish markazlari tashkil etilgan. 500 ga yaqin ish o'rinlari yaratilgan. Buning natijasida oilalarning iqtisodiy ahvoli yaxshilanib bormoqda. Xalqimiz bekorga aytmaydi, hunarli xor bo'lmas, deb.

**«YOSH DEPUTATLAR»
HARAKATI**

Nogironlikni oldini olish uchun ham zarur ishlar amalga oshirilyapti. Bu ishlarni o'quvchilarning o'zlarini bajarimoqdalar. Birgina «Yosh avlod Kengashi» a'zolarini faoliyatiga nazar salsak, ularning harakatlaridan quvonamiz. Biz Kengash a'zolarini hatto «Yosh deputatlar», deb nomladik.

Ayniqsa, ularning bug'doy uni bo'yicha Milliy dasturda ko'rsatilgan ishlari tahsinga sazovor. Non do'konlari,

Qalbm poklik dunyosida yashaydi
yoki
O'zbekiston Bolalar jamg'armasi faoliyati haqida

Ertamiz egalarini bugundan tarbiya etmoq, ularni kelajakka burkamol shaxs etib tayyorlash bizning oliy burchimizdir.

Yurtimizning qay go'shasiga bormaylik, bolalar uchun ezgu ishlar amalga oshirilayotganiga guvoh bo'lamiz. Mamlakatimizda O'zbekiston bolalar jamg'armasi faoliyati bilan yaqindan tanishganimizda ham bu ishlarning isbotini ko'rdik.

Quyida bolajon rahbar, jamg'arma raisi Yusupova Inqilob Tursunovnadon bu boradagi ishlarni gapirib berishlarini so'radik.



nonvoyxonalar, non zavodlari xodimlari o'rtasida suhbatlar tashkil etib, plakatlar, bukletlar tayyorlab, joylarga tarqatdilar. Temir moddasi bilan boyitilgan unning inson organizmiga zarurligi haqida tushuntirish ishlari olib bordilar. Deyarli Respublikamizning barcha tuman, shaharlaridagi

nonvoyxonalar ro'yxati tuzildi hamda foydalanilayotgan unlar tarkibi o'rganildi.

Albatta, qilingan ishlardan maqtanish maqsadida emas. Hali qiladigan ezgu ishlarimiz oldinda. Ammo har bir kunimizni, vaqtimizni farzandlarimizga ajratayotganimizga quvonamiz. Har bir ishimizning manzilida kelajakning ertasi, nurli yo'llari go'yo charaqlab bizni chorlayotgandek.

IQTIDORGA IMKON BOR

Abdulla MUZAFFAROV,

Bolalar jamg'armasi, Buxoro viloyat bo'limi raisi:

– Mustaqilligimizning birinchi yillaridan boshlab iqtidorli, ijodiy ko'rik-tanlovlarda g'olib bo'lgan o'quvchilarga viloyat Bolalar jamg'armasining rag'batlantiruvchi stipendiyasi tashkil etildi.

Jumladan, shahka bo'yicha Jahon va Osiyo chempioni Buxoro shahridagi 33-maktabning 5-sinf o'quvchisi Saidqosim Aliyev, yog'och o'ymakorligi tanlovi g'olibi Buxoro shahridagi 9-maktabning 6-sinf o'quvchisi Qobiljon Hojiyev, «Ijodkor ixtirosi» bolalar respublika tanlovi g'olibi Romitan tumanidagi 7-maktabning 8-sinf o'quvchisi Sherzod Yodgorov, «Yosh maqomchilar» respublika tanlovi g'olibi G'ijduvon tumanidagi 21-maktabning 6-sinf o'quvchisi Sadridin Shamsiddinov, «Bolalar estrada qo'shiqlari» g'olibi Peshku tumanidagi 28-maktabning 4-sinf o'quvchisi Mohigul Boltayeva kabi jami o'n nafar buxorolik o'quvchilar rag'batlantirildi.


TAHRIRIYATDAN:

Qadrli o'quvchilar! Sizning tuman, viloyat va shahringizda Bolalar jamg'armasi faoliyati qay darajada amalga oshirilyapti. Bu haqdagi fikr-mulohazalaringizni kutib qolamiz.

Feruza SOYIBJON qizi yozib oldi

**OYGA DO'STMISAN,
UKAJON?**


Shohjahon RAUPOV



Esse

Tunda beixtiyor uyg'onib ketdim. Kimdir erkalab yuzimni mehr bilan silagandek bo'ldi. Onam, deb o'yladim. Odatda onajonim meni har tong shunday uyg'otardilar. Ko'zimni ochdim. Yonimda hech kim yo'q edi. Boshimni yostiqtan ko'tarib xonani kuzatdim: akam bir tekis nafas olib uxlab yotibdi, onam ko'rinmasdilar. Ko'zimni yumdim. Yana o'sha hol takrorlandi: kimdir yuzimni silagandek edi. Cho'chib ko'zimni

1



ochdim. Xona jim-jit. Soatning chiqillashi-yu akamning pishillab nafas olishidan boshqa narsa eshitilmasdi.

Tashqariga quloq soldim. Biror sas eshitilmasdi. Hamma uxlayotganiga ishonch hosil qildim. Ammo menga mehr ulashgan – tunda uyqudan uyg'otgan kim bo'ldi? Axir uning taftini hozir ham his qilib turibman-ku. Butkul uyqu qochdi. O'rnimdan turdim. Xona yop-yorug' edi. Kerishayotib ko'zimni bir lahza yumgan edim, yana o'sha yoqimli taftni his qildim. Ko'zlarim yaraq etib ochildi. Ne ko'z bilan ko'rayki, derazadan to'lin oy bir quchoq bo'lib menga mehr bilan qarab turardi. Yuragim quvonchdan gupillab ketdi.

– Salom, oy! Bu men, do'stingman, – dedim derazaga yaqinlashib.

Oyga hayratlanib tikilarkanman, undan ko'z uzolmay qoldim. Keyingi paytlarda nechundir oyni – ʃirdosh do'stimni unutgan ekanman. Oyni oydin jamoliga boqib xijolat bo'ldim. Baribir u meni izlab topdi. Qiyomatli do'st ana shunday bo'ladi. Gina-kuduratni bilmaydi, huda-behudaga arazlashib do'stini tashlab ketmaydi.

Oy meni hamisha tushungan, yolg'izlatib qo'ymagan. Do'stlarim o'ziga boshqa do'st topganda, oy mendan kechmagan. Qorong'u tunlarda yo'ldoshlarim meni tashlab qochsalar-da, oy nuri

2

ila yo'limni yoritdi. U mening ko'nglim, dardimga malham, darddoshim edi. Uzun tunlarda u yuragimga bir chimdim nur ulashib, ko'nglimni charog'on etdi. O'zimga ishonch, kuch bag'ishladi, umid uyg'otdi. Shu bois, hech kimga ishonmagan sirlarimni unga aytdim, oy esa sodiq do'stimdek sirimni birovga aytmadi. U menga onamdan, otamdan, aka-opalarim, hatto mehribon singlimdan-da yaqinroq bo'ldi. Ularga aytolmagan sirlarimni oyga aytdim... Ba'zan betobligim sabab, biror yumush yoki vazifamni bajarolmasam, sinfdoshlarim ustimdan kulganlarida, buni faqat oyga aytdim. Undan dardimga shifo so'rardim. Yuragimda nimalar kechayotganini onamga aytolmas, onajonimni xafa qilishdan qo'rqardim. Shusiz ham onajonimning meni deb chekkan azoblarini mendan boshqa hech kim bilmadi. O'shanda armon to'la ko'zlariga qarash og'ir edi.

Bolaligimda Oyni, Quyoshni faqat meniki deb o'ylardim. O'rtoqlarim Sherzod, Muhammadjon, Bobur, G'ayratga tinmay bu haqiqatni uqtirgim kelardi. Ayniqsa, qalin do'stim Sherzod bilan oyni talashib qoldirik, tortishib-talashib, oxirida har birimiz o'z so'zimizda qoldirik. Har kim o'zicha haq edi. Har kim oyni o'ziniki qilib uyga qaytardi. Biz yursak, u ham yurardi, to'xtasak, to'xtardi. Nazarimda, oy menga ko'proq yaqin o'xshardi. Bir qadam qo'ysam, u ham bir qadam oldinga siljirdi. Uyga kirsam, u tomimiz tepasida turib, tezroq chiqishimni istayotganga o'xshardi. Bir kuni shu haqda akamga aytsam, u rosa kuldi: «Oy bizdan balandda bo'lgani uchun shunday ko'rinadi», deb bilag'onlik qildi o'zicha.

Davomi bor.

3

DARYO YANA OQAR TO‘LIB!

*Qalbida bahori bor odam ochilib-sochilib
kuylaydi. She‘rlari ko‘ngillarga qo‘ng‘iroq
chalgandek hisobsiz kuy bag‘ishlaydi. Sevimli
shoirimiz Murod Rahmon bugun oltmish bahorni
qarshi oldi.*

*Biz daryodil shoirimizga «Daryo yana oqar
to‘lib!» satrlari yor bo‘lishini tilaymiz.*

**Murod
RAHMON**



YOSHLIK GULSHANI

(Baytlar)

Yoshlar bor joyda hayot jo‘shqin, barqaror,
Yoshlar borki, har dilga hamroh gul, bahor...

Yoshlik, bu — joziba, aql-u zakovat,
U — sevgi, kuch-qudrat, g‘ayrat, jasorat...

Orzu oti, ishqning qanoti — yoshlik,
Insonning eng go‘zal hayoti — yoshlik.

Bilimlar sohibi — qalbi quyoshlar,
Nafosat, latofat timsoli — yoshlar.

Yoshlar! Mayli, uching oy-u yulduzga,
Ijodiy parvozlar yarashar Sizga.

Yoshlik, bu — umrning bahori demak,
Hayot kabi jo‘shar, toshadi yurak.

Jasorat, kuch-qudrat ramzidir yoshlik,
Yoshlikka xos mehr, matonat, mardlik!


NURLI MISRALAR

Istiqlolning zavq-shavqidan dillarda surur,
Har bir o‘zbek yuragida iftixor, g‘urur...
Yashnar endi O‘zbekiston — yurtim ozod, hur,
Baxt quyoshi ellar uchun sochar porloq nur...

Aslo urush ko‘rmay kamol topsin yoshlik,
Har qit‘alararo ravnaq topsin do‘stlik.
Ota-onalarning tilagidir tinchlik,
Butun dunyo xalqin yuragidir tinchlik!

Bir ming to‘qqiz yuz to‘qson birinchi yil,
Bu yil chinakam quvongan har bir dil...
Bu yil menga ikki bor omad kelgan yil:
Oilada yana bir ko‘rganman o‘g‘il.
Istiqloldan qanchalar quvongan elim,
Osmonlarga ko‘tarilgan bu ko‘nglim!

Osmonda oy, quyosh porlab,
Yana asta botaverarkan...
Kunlar, oylar, yillar, asrlar —
Lahzalarday o‘taverarkan.
Bu dunyoga turli-tuman,
Odam kelib-ketaverarkan...
O‘z baxtini topmaganlar,
Umr bo‘yi kutaverarkan.
Bu bevafo, shirin hayot,
Doim maftun etaverarkan...



EZGU HISLAR...

Bir gul bor — yashnab turar, qurimas, so‘lmas,
Bir nur bor — porlab turar, hech qachon so‘nmas.
Egilar-u bukilar, ammo hech sinmas —
Bir kuch bor — eng qudratli, aslo yengilmas.

Bu gul — Haqiqat,
Bu nur — Haqiqat,
Bu kuch — Haqiqat!

Bir qush bordir — hamisha yuksak parvozi,
Bir kuy bordir — yoqimli doimo sozi...
Bir so‘z bordir — keskir-u o‘tkir ovozi,
Bir ko‘l bordir — eng kuchli, dillar e‘zozi.

Bu qush — Adolat,
Bu so‘z — Adolat,
Bu ko‘l — Adolat!

Bir yo‘l bor — oydin, toza, ketkazar g‘amni,
Mehrdek chorlab turar, yanchar alamni.
Bir tog‘ bor — hech qulamas, suyar odamni,
Bir bog‘ bor — yashnatar butun olamni!

Bu yo‘l — Imondir,
Bu tog‘ — Imondir,
Bu bog‘ — Imondir!

Adolatsiz — na taxt-u na baxt barqaror,
Gar nohalol mol-dunyo, davlat ham bekor!
Murodiga yetgay pok, imonli do‘st-yor,
Chin sevgili yurakda hamisha bahor!

To‘g‘rilik — Sog‘lik,
Halollik — Boylik,
Haq yo‘l bu — Shodlik!

MENI NECHUN O‘YLAMAYSIZ?


(Farzand nidosi)

O‘tli ko‘zlar uchrashganda,
Ikki yurak tutashganda,
Orzu qildingiz o‘shanda...
Men tug‘ildim bu gulshanda.
Endi ishqni kuylamaysiz,
Meni nechun o‘ylamaysiz?

Bir-biringiz debon yomon,
Ketasizlar ikki tomon...
Men qolaman bo‘lib sarson,
Kim haqligin bilmay, hayron.
Shubhalarda qiynalgaysiz,
Meni nechun o‘ylamaysiz?

Etgansiz menga jon ato,
Shu jon sizga bo‘lsin fido...
Nelarda, kim qildi xato,
Ishq buncha tez bo‘lmish ado?!
Shodliklarga yo‘lamaysiz,
Meni nechun o‘ylamaysiz?

Ikkingizda xayol boshqa,
Xayolda — er, ayol boshqa...
Umr o‘tar — janjal, rashkda,



Yurak-bag‘rim bo‘ldi qashq;
Bir-biringiz ayamaysiz,
Meni nechun o‘ylamaysiz?

Mehrdan dil qachon yashnar?
Turmush uchun baxt yarashar.
Bu baxt uchun kim kurashar
Sizlar borki, orzu yashar.
Birga yashab, yayramaysiz,
Meni nechun o‘ylamaysiz?

Sizsiz — unib, o‘smoq qayda,
Sizsiz — yasholmayman, dada!
Sizsiz — bo‘lmas hech tantana,
Sizsiz — yasholmayman, ona!
Ajrallishdan so‘ylagaysiz,
Meni nechun o‘ylamaysiz?

Ahillikda go‘zal hayot,
Sizlar bilan bo‘lsin Murod.
Arazlardan kutmang najot,
Oilani etmang barbod!
Kelajakka bo‘ylamaysiz,
Meni nechun o‘ylamaysiz?!

Tezkor zamonada, texnika asrida yashayapmiz. Fan, texnika sohasidagi ixtiro va yangiliklar, kashfiyotlar ajablantirmay qo'ygani ham rost. Ayrim bolakaylarni aytmaydizmi, harf tanishmaydi-yu, kompyuterda o'yin o'ynashni qoyillatishadi. O'smirlar esa bu «sehrli quti» qarshisida soatlab o'tirishsa ham, «zerikdim» deyishmaydi. Yoshlarimizning kompyuter bilimdoni bo'lishgani yaxshi, albatta. Bilmaganlarini o'rganishadi, vaqtni tejashadi. Biror ma'lumot kerak bo'lsa, kutubxonadan kitob izlashga hojat ham qolmaydi. Shunday qulaylik turganda, kitob o'qishga ne hojat? Kompyuterdan foydalanish har doim ham yaxshi oqibatlarga olib keladimi? Muxbirimiz Dilafro'z XUDOYBERDIYEVA shu kabi savollar bilan ayrim o'quvchilarimiz, ustozlarimizga murojaat qildi:

Samara MIRZAYEVA,
Toshkent bank kollejining 2-bosqich talabasi:

– Darhaqiqat, kompyuter insonlarning mushkulini oson qiladi. Ammo monitor qarshisida 30 daqiqadan ortiq o'tirish inson salomatligi uchun o'ta zararli. Shuningdek, ayrim tengdoshlarimiz internet orqali yoshiga to'g'ri kelmaydigan narsalarni ham tomosha qilishadiki, bu ular tarbiyasiga salbiy ta'sir ko'rsatmay qolmaydi. To'g'ri, internet aslida «beminnat dastyor». Lekin internet orqali kimlarningdir g'oyalari ko'chirib olmasdan, ko'proq kitob o'qib, o'z shaxsiy fikrimizga ega bo'lganimiz, fikrlash doiramizni kengaytirganimiz afzal, menimcha.

Muxtor MUHAMMADALIYEV,
Glier nomidagi Respublika musiqa akademik-litseyi o'quvchisi:

– Shaxsan men kompyuterdan faqatgina risolalar tayyorlash yo bo'lmasa, juda zarur ma'lumotlar izlash jarayonidagina foydalanaman. Qanday vaziyatda bo'lmasin, imkon qadar kitob o'qigan ma'qul, deb hisoblayman. O'zimga kerakli ma'lumotlarni kitoblardan izlashga sira erinmayman. Kelajakda yetuk san'atkor bo'lmoqchiman.

O'zi mehnat qilmay, izlanmay, tayyorini internetdan ko'chirib olaveradigan insonlarni fonogrammani qo'yib olib, qo'shiqni jonli tarzda ijro etayotgan xonandaga o'xshatgim keladi. Insonlarning intellektual salohiyatini oshirishda kitobning o'rnini bosadigan manba yo'q, deb o'ylayman.

Iroda RUSTAMOVA,
Oxunboboyev nomidagi tibbiyot kolleji talabasi:
– Mening nazarimda, internetdan foydalanish afzalroq. Chunki internetdagi ma'lumotlar kun sayin yangilab boriladi. Bizning sohamizda bu juda muhim. Bu fikrim bilan kitob o'qish befoyda demoqchimasman, ammo kompyuterni ham cheklash to'g'ri emas. Ba'zan inson hayotini saqlab qolish uchun kitob o'qib o'tirishga fursat bo'lmaydi. Bunday kezlarda, shubhasiz, kompyuterga murojaat qilamiz. Menimcha, bu eng zamonaviy va juda qulay qurilma.

Dilnoza HASANOVA,
Amir Temur nomidagi 112-maktab o'quvchisi:

– Maktabimizda informatika darslaridan saboq berish keng yo'lga qo'yilgan. Ayrim o'zlashtirilmay qolgan mavzularimizni darsdan keyin bemalol o'rganishimiz mumkin. Ammo ayrim sinfdoshlarimiz fursatdan foydalanib, boshqa fanlardan berilgan uy vazifalarini ham kompyuter yordamida bajarib olishadi. Ustoz uy vazifasini qanday bajarganliklarini so'rasalar, bilolmay jim turaverishadi. Shu tariqa navbatdagi mavzularni, misol-masalalarning yechilish usullarini ham tushunolmay qolishadi.

Hokim ASILOV,

TMI qoshidagi moliyachi-biznes maktabi direktori, dotsent:

– Bugungi kunda jamiyatimiz hayotiga kompyuterlarning chuqur kirib borishi fan-texnika sohasini taraqqiy etishiga ulkan hissa qo'shmoqda. Ilgarilari jamiyatdagi barcha iqtisodiy-ijtimoiy vazifalar insonlarning qo'l va aqliy mehnati evaziga amalga oshirilardi. Faqat zarur sohalardagina kompyuterlarning dastlabki modellaridan foydalanilardi. Bora-bora texnika rivojlanib, hozirda har bir sohada yetakchilik qilmoqda. Bu quvonarli hol, albatta. Yoshlarga kompyuter bilimlaridan saboq berish, ularni jamiyatga foydasi tegadigan yetuk mutaxassis qilib tarbiyalash juda muhim vazifa. Lekin yana bir masala ko'ndalang kelmoqda. Yoshlarimiz ilmiy va badiiy adabiyotlarni mutolaa qilishdan voz kechishlari mutlaqo noto'g'ri. Bizga ustozlarimiz «Qancha ko'p kitob o'qisang, ma'naviy kamolga yetasan. Fikring ulg'ayadi, oqdan qorani ajratadigan bo'lasan», deb juda ko'p nasihat qilishardi. Menimcha, inson hayotida kitobning ham, kompyuterning ham o'z o'ri bor. Ular bir-birini to'ldirib tursagina, kutilgan natijaga erishish mumkin.



OMON

Boshga kiyib shapkasin,
Osib ko'm-ko'k papkasin.
Ohista yurib omon,
Yo'l olar maktab tomon.
O'tar yo'ldan juda ko'p,
Tirillab traktorlar.
Odatin bebosh Omon,
Yana bir bor takrorlar.
Osildi traktorga,
Qilig'in qilmay kanda.
Quvonganicha ketdi,
Qisqa qilib aytganda.
Maktabiga ham yetdi.
Maktabga yetgan shu on,
Tusholmay qoldi Omon.
Yiqilib ketdi yomon
Xuddi xaltaga o'xshab
Turolmay yotib qoldi.
Oyog'i og'rib-qaqshab,
Voy-voylab uvvos soldi.
Traktor deb yugurar
Rahmi kelmas oyoqqa!
Endi suyanib yurar
Yog'och qo'ltiqayoqqa.
O'zini qo'rqmas bilgan,
Ko'zin ochdi Omonning.
O'zboshimchalik qilgan,
Jazosidir yomonning.

MEHMON

Mehmon bo'lib keldi Sher,
Mezbonlik qildi Bo'ri.
Bo'ri Sherga boqib der:
– Sizga sharobning zo'ri.
Qani, oling, ichamiz, –
dedi Bo'ri jilmayib.
– Bo'pti, ichsak ichdik-da, –
Sher ham qoldi iljayib.
Kuylab qo'shiq baralla
So'ng raqsga tushdilar.
Raq avjiga chiqib,
Mastlikdan urishdilar.
Bazm to'ldi janjalga,
Sher Bo'riga otildi,
Mehmon emas ajaldan,
Bo'ri zo'rg'a qutuldi.

Rustam XUDOYBERGANOV,
Qoraqalpog'iston Respublikasi, Beruniy tumani

Shahnoza G'ANIYEVA,
Uchtepa tumanidagi 116-maktabning 7-sinf o'quvchisi:

– Maktabimiz yaqinida internet klubi ochilgan. Tanaffusga qo'ng'iroq chalinishi hamonoq, ko'pchilik bolalar o'sha yoqqa oshiqishadi. O'yinlarga berilib ketishsa, darsga ham kirmay qo'ya qolishadi. Dars davomida ham ularning xayoli ana shu o'yinlar bilan band bo'ladi.

Texnikaning rivojlanayotgani yaxshiku-ya, lekin kompyuterlar o'quvchilarni kitob va bilimlar dunyosidan yiroqlashtirayotgani tashvishga soladi kishini.

Qaniydi, o'quvchilarimiz klublarga emas, kompyuterlashtirilgan kutubxonalarga oshiqishsa...

Nodira MIRZAITDINOVA,
O'zbekiston Davlat jahon tillari universiteti talabasi:

– To'rt yildan buyon ingliz tilini o'rganaman. Bu tilni mukammal o'rganish uchun ko'plab ilmiy, xorijiy adabiyotlardan, katta-katta lug'atlardan foydalanmoqdaman. Zarur bo'lsa, internetga ham murojaat qilaman. Lekin baribir kitob varoqlab, kerakli ma'lumotlarni olgan boshqa. Ko'p kitob o'qigan odamning aqli rivojlanadi, dunyoqarashi kengayadi, nutqi ravon bo'ladi.

TAHRIRIYATDAN:

Aytaylik, qiziqarli bir kitobni maroq bilan o'qiyapsiz. Uni varaqlaganingiz sari, satrlari ummondek mavjlanib, to'lqinlanib, sizni asta o'z domiga tortaveradi. O'qiganingiz sari uning tub-tubiga sho'ng'ib, bilim otlig' dur-u javohirlardan teraverasiz.

Aziz o'quvchilar, zamon bilan hamnafas bo'laman, deb buyuk ajdodlarimiz yaratgan adabiy merosdan bebahra qolmanglar. Zamonaviy texnika vositalaridan foydalanish barobarida bo'sh vaqtinizni ko'proq kitob o'qishga, aqliy salohiyatingizni rivojlantirishga sarf eting.

YURAKKA TUSHDI SHE'R ISHQI

Qo'zi ISMOIL

FUTBOLCHI BO'LAMAN

-To'p! To'p! - yetar to'pim bor,
Sira qo'ldan qo'ymayman.
Do'stlar bilan har kuni,
Mazza qilib o'ynayman.

Yosh bo'lsam-da, hozirdan,
Orzularga to'laman.
Katta bo'lsam, albatta
Zo'r futbolchi bo'laman.

TOSHKO'MIRGA

Topdik seni Toshko'mir,
Qora yerning qaridan.
Ketuvdingmi bosh olib,
Kamsitishning baridan.

Qo'y, o'ksima zarracha,
Qora deb o'z aftingdan.
Yonsang, xuddi Quyoshsan,
Biz rohatda taftingdan.

QO'ZIQRINING DEGANI

Qo'ziqorin bo'laman,
Vitaminga to'laman.
Kel, ey bola, kelaqol,
Bu yerdaman, topib ol.

Yotaverib zah joyda,
Chirib ketmay befoyda.
Orzuimga yetayin,
Dasturxonning bezayin.

Axtamul KARIM

Qo'liga qalam olib, so'z qidirgan kishining mahzun holatini ko'z oldingizga keltiring. Bu ayni bolalikning beg'ubor dâmlarida juda ko'plarni turli xil kuyga solgan azaliy darddir. Unsiz ko'ngilda nimadir paydo bo'lgan kezlar. Siz o'zingizni qo'yarga joy topolmay qolasiz. Nimanidir qidirishga tushasiz. Ana o'sha «nima» sizni bir umr she'riyatga bog'lab qo'ysa, ajabmas. Bu yo'l har kimda har xil kechadi. Ko'zlarida hayrat qotib qolgan bolakayning Yaratgan mo'jizalari nazdida lol qolishi, zora nimanidir uning yurak torlariga tegib ketgan desak, balki xato qilmagan bo'lar edik.

Gazetamizga yog'ilib kelayotgan hisobsiz maktublarga to'kilgan bolajonlarimizning beg'ubor hishayajonlari bizni bir lahza bo'lsa-da, bolalik olamiga yetaklaydi. Bir paytlar majnuntollar ostida majnuntollar yanglig' xayolparast bo'lib qolganimizni eslaymiz. Dilida ilk muhabbat chirog'i miltirab yonganida, kishi chiroyli so'z izlashga oshiqadi. Bu muhabbat dardidir.

Muhabbatdin muhabbat bo'ldi paydo, Muhabbatsiz kishidan qoch, Huvaydo.

Satrlarning xabar berishicha, dilida muhabbati bor odamdan hech qachon yomonlik chiqmaydi. Muhabbati bor odamning Vatanga, onaga bo'lgan hurmati balandligiga doimo guvoh bo'lganmiz.

Keling, tengdoshlaringizning ichki his-tuyg'ulari bilan sizlarni ham xabardor aylasak.

Farg'ona viloyati, Dang'ara tumani iqtisodiyot kasb-hunar kollejining talabasi

Rahimaxon Xudoynazarovning «Ko'zim qatlarida berkingan bahor» sarlavhali she'ri yarq etib ko'ngilga yorug'lik baxsh etishini sezmay qolamiz.

**Yuzlarim lovullar misoli alvon,
Sog'inch hislarimga ro'mol o'raydi.
Bag'rini ochadi qushlarga ayvon,
Dilim dilxushlikdan najot so'raydi...**

Mana tasvir. Biz Rahimaxonning o'tkir ko'z rassom ekanligini ilg'aymiz. Ko'z oldimizda bahor jonlanadi. Qirlarda alvondek yastangan qizg'aldoqlar, ayvonlarga oshiqqan qaldirg'ochlar garchi she'rda tilga olinmagan bo'lsa-da, xayolimizdan kechaveradi. Demak, she'r yaratilibdi!

Rahimaxonning: «**Qorlar daraxtlarga o'raydi ro'mol**», «**Devorlar kelindan ro'molcha kutar**».

**Qorlar qo'nib kipriklarimga,
Oqib ketar ko'z yosh misoli...**

singari satrlarida joziba borligini sezamiz. Farg'onalik yana bir singlimiz Nodira Egamberdiyeva o'zining «Bobur bobom» she'rida:

**Hindistonni o'z qo'liga olganlar,
G'azallari mangu bo'lib qolganlar,
Avlodlarning faxri bo'lib qolganlar,
Yurtim faxri boburiy bobom...**

deya yozadi. Nodira kishini o'ylantiradigan so'zlarni qidirib o'tirmaydi. Hammaga ayon bo'lgan jo'n so'zlarni aytib ketaveradi. Uning bu usulini namanganlik qizimiz Iroda Abdurazzoqova ham qo'llaydi:

**She'riyat mulkining sultoni,
Alisher bobomdir, Navoiy bobom.
Shuncha yillar armonsiz,
Alisher bobomdir, Navoiy bobom...**

kabi so'zlarni qalashirib tashlaydiki, uni she'rlikiga ishongim kelmaydi. Bunday satrlarni qashqadaryolik Humayra Eshmo'minova o'zining «Bahor»,

kabilar...

Dursl xonim lablarini qimtidida, piyolasini og'ziga tutdi. Janob Dursl esa bugun Potterlar familiyasini eshitganini xotiniga aytishga haddi sig'armikin, deya o'ylanib qoldi. Va haddi sig'masligiga qaror qildi. Buning o'rniga u shunchaki gap orasida aytganday dedi:

- Ularning o'g'li Dadliga tengdosh shekilli, shundaymi?

- O'ylaymanki, ha, - Dursl xonimning ovozi muz kabi sovuq edi.

- Uning ismi qandayligini eslatib qo'yolmaysanmi? Garold edi, shekilli?

- Garri. Menimcha, eng yaramas, oddiy xalqchil ism.

- Ha, albatta, - Janob Durslning yuragi shuv etib ketganini sezdi. -

Fikringga tamomila qo'shilaman.

Janob Dursl bu mavzuga ular choy ichayotganlarida ham, o'rnidan turib, yuqoridagi yotoqxonasiga kirgan chog'larida ham, ortiq qaytmadi. Ammo Dursl xonim yuvinish xonasiga ketganida, janob Dursl derazani ochib, boqqa qaradi. Mushuk hanuzgacha devorda go'yo kimnidir kutayotganday ko'chaga tikilib o'tirardi.

Janob Dursl bugun ro'baro' kelganlarining barchasi tushida sodir bo'lmaganmikin, deb o'zidan so'radi. Mabodo, unday bo'lmasa, nahotki, bularning barchasi Potterlar bilan bog'liq bo'lsa? Agar shunday bo'lsa... va Dursllar o'sha Potterlarga aloqadorliklari oshkor bo'lib qolsa... Yo'q, janob Dursl

buni ko'tarolmasdi.

Dursllar o'ringa yotishdi. Dursl xonim tezda uxlab qoldi, eri esa bugun ko'rgan va eshitganlarining hammasini eslab, uyqusiz yotardi. U uxlab qolishiga qadar xayoliga kelgan eng so'nggi fikr juda yoqimli edi: garchi bugungi ro'y bergan hodisalarga aslida Potterlar aloqador bo'lsalar ham, ularning Tis ko'chasida paydo bo'lishlari umuman shart emas. Buning ustiga, Potterlar uning va Petunyaning ularga qanday munosabatda ekanliklarini yaxshi bilishardi.

Shu bois janob Dursl na o'zi, na xotini atrofda ro'y berayotgan g'alati hodisalarga aralashishlariga aslo yo'l qo'yamasligini o'ziga aytdi.

Janob Dursl qattiq yanglishardi, ammo buni o'zi bilmasdi.

Uzoq kutilgan va notinch uyqu janob Durslning o'z og'ushiga olgandi, biroq, uying devorida o'tirgan baroq mushuk umuman uxlamog'chi emasdi. U xuddi haykal kabi qimirlamasdan, kiprik ham qoqmay Tis ko'chasi adog'iga tikilib o'tirardi. Qo'shni ko'chada mashina eshigi baland tovushda taraqlaganida ham, u hatto qilt etmadi va


boshi uzra ikkita ukki uchib o'tgan chog'da, kiprik ham qoqmad. Faqat yarim tunga yaqin xuddi tosh qotgan mushukka axiyri jon kirdi.

Ko'chaning narigi boshida, aynan mushuk betinim tikilib turgan yerida, bir odam paydo bo'ldi. U go'yo yer ostidan chiqqanday yoki osmondan tushganday kutilmaganda va sharpasiz paydo bo'ldi. Mushukning dumi bir yoqdan ikkinchi tomonga siltalandi, ko'zlari esa qisildi.

Tis ko'chasida hech kim bu kishini sira ko'rmagandi. U baland bo'yli, ozgan hamda beliga tushadigan uzun sochi va soqolining kumush rangiga qarab xulosa

chiqarganda, ancha kekxa edi. U egniga uzun kamzul kiyib, uning ustidan yer supurar qizil ridoga o'ralib olgandi, oyo-g'ida tasma bilan bezalgan baland poshnali botinka ko'zga tashlanardi. Qora ko'z-oynak taqqan ko'zlari moviy rangda bo'lib, tiyrak, chaqnoq va shu'la taratardi, burni esa juda uzun va xuddi kamida ikki marta sindirilganday qiyshiq edi. Bu kishining ismi Albus Dambldor edi.

Davomi bor.



Davomi. Boshi o'tgan sonlarda.

- Ancha bo'ldi! - dedi keskin ravishda Dursl xonim. - Bu haqda nima uchun so'rab qolding?

- Yangiliklarda har xil sirli narsalar haqida gapirishdi, - ming'irladi janob Dursl. Vazn jihatdan bahaybat farqlari bo'lishiga qaramasdan, eri xotinidan hayiqib turardi, uyda aynan xotini hukmron edi. - Ukkilar... to'kilayotgan yulduzlar... shahar bo'ylab g'alati kiyingan kishilar to'dalari yurishibdi...

- Xo'sh, nima bo'пти? - keskin ohangda erining so'zini shartta bo'ldi Dursl xonim.

- Shu, o'yladimki... Balki... Ehtimol, buning qandaydir bog'liq joyi... Axir, tushunasan-ku... Uning

Biz uchun imkoniyatlar keng...

Barchamizga ma'lum, 2008-yilni Prezidentimiz «Yoshlar yili», deb e'lon qildilar. Mamlakatimizning kelajagi, ravnaqi aynan mana shunday iqtidorli yoshlarning qo'lida. Bugungi kunda ularning imkoniyatlari juda keng. Qayoqqa qo'llarini uzatishsa, yetadi. Xullas, yaxshi o'qish, ishlash uchun barcha sharoitlar yaratilgan. Bu haqda yoshlarimizning fikrlari qanaqa? Biz bu savol bilan O'zMUning jurnalistika fakulteti 1-kurs talabalariga murojaat qildik:

Nodira NORTOYEVA:

ULKAN MARRALARGA YETISHAMIZ

– Bu yilni «Yoshlar yili», deb e'lon qilinganidan juda xursandman, benihoya quvonchdaman. Bu bizga yana ham ulkanroq mas'uliyat yuklaydi.



Sabohat SULTONOVA:

YURT KELAJAGI ISHONCHLI QO'LLARDA

– Biz yoshlarning bilim, malakalarimizni oshirishimiz uchun keng ko'lamda ishlar olib borilmoqda. Ayniqsa, iste'dodlarni kashf qilish maqsadida tashkil etilgan «Kelajak ovozi» mega-tanlovi, yosh avlodni qo'llab-quvvatlash maqsadida «Fond Forum»

jamg'armalarining tashkil qilinishi shubhasiz, O'zbekiston yoshlarining yutug'i, desam mubolag'a bo'lmaydi.

Sadoqat BESHIMOVA:
VAQTIMIZNI BEHUDAGA

SHARH

– Y a q i n d a bizning Buxoro viloyati, Olot tumanida ham iqtisodiyot kasb-hunar kolleji qurilib, ishga tushirildi.



Chekka qishloqlarda ta'lim-tarbiyaga katta ahamiyat berilayotgani, u yerdagi maktablarning shahar-nikidan qolishmayotganligi kishini quvon-tiradi. Yurtimiz yoshlariga birgina tilagim shu: bo'sh vaqtlarimizni havoga emas, balki yurt ravnaqiga, kelajagining porloqligi uchun sarflaylik.

Kamola ERGASH qizi

KITOBIM NASHR ETILDI



– Bolaligidan jurnalist bo'lishni juda orzu qilardim. O'zimcha kichkina hikoyachalar, qatralar qoralab turardim.

Bu yil esa «Yoshlar yili»ga bag'ishlab «Vatan tuprog'i» nomli kitobim nashr etilish arafasida turibdi. Qayerga bormaylik, biz uchun barcha qulayliklar yaratib berilgan.

Imkoniyatlarimiz yana-da kengay-ganidan mamnunmiz, albatta o'z o'rnida yurt ishonchini oqlashga so'z beramiz.

Ajib dunyo

XORIJDA MAKTAB TA'LIMI

Dunyoning barcha mamlakatlarida bo'lgani kabi, respublikamizda ham maktab ta'limi davlat qaramog'idadir. Mamlakatimizda bolalar maktabgacha ta'lim muassasalarida tarbiyalanib, yetti yoshdan boshlab maktabga qadam qo'yishadi. Xo'sh, dunyoning rivojlangan davlatlarida ham shundaymik?

Fransiyada bolalar olti yoshdan maktabga borisharkan. Ularning bizdan farqi shuki, o'quvchilar maktabga borgach, 1-sinf dan emas, balki 11-sinf dan o'qishni boshlashadi. Maktabni bitirayotganda esa 1-sinfni tamomlab, kollej va oliy o'quv yurtlariga hujjat topshiradilar.

Germaniyada ham bolalar uchun ta'lim olti yoshdan boshlanadi. Faqat ular 11 yil emas, 12 yil ilm oladilar.

Ispaniyada esa bolalarning olti yoshdan maktabga borishi belgilangan. Ispan bolalari 8 yil o'qib, undan so'nggina kuchaytirilgan toifadagi hunar-texnika va tijorat maktablarida o'z bilimlarini oshirishadi.

AQSHning ko'pchilik shtatlarida boshlang'ich majburiy ta'lim 7 yoshdan belgilangan, bu ta'lim 12 yil davom etadi.

Sharq mamlakatlaridagi bolalar boshlang'ich majburiy ta'limni 6-7 yoshdan boshlashadi. Yaponiyada 6-15 yoshgacha bo'lgan bolalar maktab ta'limida bo'lishadi. 16 yoshdan uch yillik ixtiyoriy kasb-hunar maktablarida o'qishadi. Koreyalik bolalar 6 yoshdan boshlang'ich majburiy ta'lim qaramog'ida bo'lib, 11 yil ta'lim olishadi.

Xitoyda esa bizning bolalar kabi 7 yoshdan maktabga borishadi. Ular 12 yil bu dargoh ixtiyorida bo'lib, keyin oliy o'quv yurtlariga yo'llanma olishadi.

Sherali NAMOZOV

«Maktab o'quvchisiga qo'l telefoni kerakmi?» sarlavhali maqola aynan biz o'qituvchilarning dilidagini topib yozilgandek bo'libdi.

Mavzuga qaytib

O'qituvchi dars o'tyapti. Lekin o'quvchining e'tibori unga emas, qo'lidagi telefoniga qaratilgan. Goh u sinfdoshiga, goh bunisiga «SMS»lar yuborib o'tiribdi. Ustozi, telefoningni o'chirib qo'y, deya tanbeh bersa, unga ham javob tayyor: «O'chirolmayman, hozir dadam yo onam telefon qilib qoladilar», deydi bamaylixotir.

To'g'ri, xizmatda bo'lgan ayrim ota-onalarimiz farzandlaridan xabar olish, darslar tugaydigan vaqtni bilish uchun qo'ng'iroq qilib turadilar. Agar ular: «Dars paytida telefoningni o'chirib qo'ygin, bo'shasing bilan menga telefon qilasan», deya tayinlasalar, maqsadga muvofiq bo'lardi. Shunda o'qituvchining ham, o'quvchilarning ham fikri bo'linmaydi.

Fursatdan foydalanib, o'quvchilarning kiyinish odobi haqida ham fikrlarimizni bildirmoqchiydik. Kiyinish odobi bu ma'naviyat ko'zgusi axir.

Hozirgi kunda o'quvchilarimizning kiyinishlariga e'tibor qaratsak, maktabga emas, go'yoki tug'ilgan kunga yoki biror bayramga ketayotgandek ko'rinadi kishiga. Kim o'qituvchi-yu kim o'quvchiligi ajratolmay ham qolamiz, gohida. Axir maktab formasi kiyib yurishning ham o'ziga yarasha gashti bor-ku. Qolaversa, hammaning sharoiti har xil. Qay bir oilaning farzandiga qimmatbaho kiyimlar olib berishga qurbi yetsa, kimnikidir aksincha. Agar hamma o'quvchilar bir xilda forma kiyishsa, hech kimning ko'ngli o'ksimaydi.

BIZNING TAKLIF:

«Yoshlar yili»da yosh modelyerlar ko'rik-tanlovi uyushtirilsa. Bayrog'imiz rangi bo'lmish moviy, yashil, surma rangli matodan o'quvchilar uchun bir xilda maktab formalari joriy qilinsa, ayni muddao bo'lardi.

Muqaddam YUSUPOVA,
Mahmuda BADALOVA,
Toshkent shahar, Sobir Rahimov tumanidagi
249-maktab o'qituvchilari

POLVONLAR NASLIDAN


Milliy kurashimiz butun jahonga yoyilmoqda. Sportning bu turi yoshlarda halollik, mardlik, faxr-iftixor tuyg'ularini shakllantiradi. Ko'plab yoshlarimiz qatorida Termiz olimpiya zahiralari kolleji talabasi Botir Qobilov bobosi mashhur polvon o'tganidanmi, milliy kurashimizga mehr qo'ydi. Sport sohasida muvaffaqiyatga erishishni murabbiy ustozlarning xizmatidagi tasavvur etish qiyin. Botirjon kollejdagi tahsil olish bilan birga, sambo bo'yicha O'zbekiston chempioni Alimardon Adimardonov, dzyudo bo'yicha xalqaro toifadagi sport ustasi Rustam Abrayev va milliy kurash bo'yicha faxriylar o'rtasida jahon chempioni Olimjon Hayitov singari ustozlaridan kurashning sir-asrorlarini o'rgandi. O'tgan besh yilda respublika birinchiliklari, Osiyo va jahon chempionatlarida qatnashib, sovrinli o'rinlarni qo'lga kiritdi. 2006-yil oktabr oyida Santo-Domingo shahrida yoshlar o'rtasida o'tkazilgan jahon birinchiligida 90 kg. vazn toifasida 2-o'rinni qo'lga kiritdi. Shu yili Samarqandda o'tkazilgan respublika birinchiligi musobaqalarida 100 kg. vazn toifasida g'olib chiqdi.

Shuningdek, ko'plab viloyat chempionatlari, xalqaro turnirlarda faol qatnashib kelmoqda.


«Sport bilan shug'ullanadigan inson o'zini yaxshi ko'radi, hurmat qiladi. Boshqacha aytganda, o'zini yaxshi ko'radigan odam sport bilan shug'ullanadi. Farzandlarini ham sportga jalb etadi. Buni qo'llab-quvvatlashimiz, aholi orasida sport madaniyatini yuksaltirishga erishishimiz kerak». Yurtboshimizning ushbu so'zlari tasdig'ini Botirbek misolida ham ko'rishimiz mumkin. Negaki, uning bobosi ham kurash tushib, elga tanilgan. Otasi esa Surxondaryo viloyati «Sog'lom avlod uchun» jamg'armasi direktori Toshmurod Qobulov yoshlar orasida sportni, sog'lom turmush tarzini keng targ'ib qilayotganlardan biri. Farzandlarini sportga oshno qilgan ham uning o'zi.

Bilagida kuchi, yuragida o'ti bor Botirbek Qobilov mustaqil yurtimiz sharafiga nufuzli musobaqalarda yuksaklarga ko'tarish ishqini bilan yashayapti.

Zamira TO'LAGANOVA



BUGUNNING



«YANGI AVLOD»LARI

«YANGI AVLOD – 2007» BOLALAR IJODIYOTI G'OLIBI

1. Yoqtirgan fani: adabiyot, tarix, ingliz tili.
2. Filmi: «Shum bola», «Mahallada duv-duv gap», «Toshkent – non shahri».
3. Havas qilgan ustoz xonandalari: Farrux Zokirov, Zamira Suyunova, Rashid xoliqov, Tohir Sodiqov.
4. Sport turi: stol tennisi, ushu.
5. Taomi: xonim, do'lma, tandir-kabob.
6. Rangi: ranglar malikasi – oq rangni yoqtiradi. Bu rang poklik, beg'uborlik ramzidir.
7. Sevimli bayrami: «Navro'z».
8. Multfilmi: «Senimi, shoshmay tur», «Sohibjamol va mahluq».

Nafosatxon, shuningdek, kompyuterda ishlashni, do'stlari bilan internetda muloqot qilishni yoqtiradi. Kelajakda jurnalist bo'lmoqchi.

Nafosatxonning «Donishmand yigit», «Baxt daraxti», «Lolaqizg'aldoq», «Shabnamli non» ertak va hikoyalari viloyat «Surxon tongi», «Termiz oqshomi» gazetalarida chop etilgan.

Ijodkor qiz Nafosatxonning muvaffaqiyatlarini sanay turib, yoshlari iste'dodli yurtning kelajagi buyuk ekanligiga ishonamiz.

Omad senga yor bo'lsin, Nafosatxon!

Nafosatxon Tojiboyeva viloyatdagi o'tkaziladigan gala konsertlar, ommaviy bayramlar («Navro'z» va «Mustaqillik»)da «Istiqlol», «O'zbekiston», «Kapalak» kabi dilbar qo'shiqlari bilan ishtirok etgan. «Osiyo taronalari» xalqaro bolalar festivali qatnashchisi.

Nafosat Surxondaryo viloyat teleradio-kompaniyasida dastlab «Beg'ubor olam» (1998-2000), «Erkatoy», «Kamalak», (2000-2002), «Bilasizmi, bolalar?» (2003-2004), «Umid yulduzlari» (2005) kabi bolalar va o'smirlar ko'rsatuvlari boshlovchisi sifatida faoliyat ko'rsatgan. 2003-yil Nafosatxon «Yoshlar teleradiokanali», «Yangi avlod» studiyasi tomonidan «TV jurnalisti» sertifikatini bilan taqdirlangan. U, shuningdek, «Yangi avlod – 2007» Bolalar ijodiyoti festivali g'olibasini. (Nasriy asarlar va sahna asarlari uchun ssenariylar yo'nalishi bo'yicha.)

NAZOKAT bonu


HUNARMAND BOLA

Kimki hunarga bosh egib, uni sevib, sidqidildan o'rgansa, hunar uni o'zining bebaho mahsuli bilan albatta bir kun siylaydi va elga tanitadi. Yoshlarning bir qanoti hunar, bir qanoti kasb bo'lsa, shundagina bekam-u ko'st hayot tarzini yaratishlari mumkin. Ammo ushbu haqiqatni hamma ham o'z vaqtida anglay olmas ekan.

Inson zoti ko'p ishlarga qodir. Hayotda u shunday buyuk ishlar qiladi-ki, ba'zida o'zi qilgan ishiga o'zi lol qoladi, aqliga sig'dira olmaydi.

Insonning o'zi bir dunyo bo'lsa, tuyg'ulari bir daryo misolidir. Naqqoshlik san'atini butun mehrini berib o'rganayotgan Shayxontohur tumanidagi 98-maktab-internatining 6-«A» sinf o'quvchisi o'n uch yoshli Furqatjon Musayevni suhbatga chorladik. Uning fikricha, naqqoshlik san'ati xayolini o'g'irlagan. Tun-u kun o'z dunyosida jilolanayotgan naqshlar jajji hunarmandni ta'qib etaveradi. Kelajakda boshqa sohani egallasa ham, ammo bu hunar unga ortiqchalik qilmasligini ich-ichidan his etadi. U tengdoshlarini bo'lmag'ur ishlarga chalg'ib qolmasdan, ko'proq hunar o'rganishga chorlaydi. Furqatjon so'zini tugatar ekan, «Men o'z kelajagimga ishonaman, har doim do'st-u birodarlarimdan kam bo'lmasdan yashashga harakat qilaman, odamlarga foydam tegsa, o'zimdanda ko'nglim to'ladi», deb ishonch bilan gapirdi.

NAFISA



OZ-OZ O'RGANIB DONO BO'LUR

Aziz o'quvchi!

Bugun sen bilan soxta do'stlik haqida suhbatlashamiz. Chunki dunyoda ko'ngliga yaqin sirdosh do'st topgan kishidan baxtli inson yo'q, ammo bunga erishish oson emas. Begona qalbga zo'rlik bilan kirib bo'lmaydi, bil'aks, bunday do'stlik dushmanga aylanib, oxir-oqibat tanazzulga olib keladi.

Soxta do'stlar haqida allomalar, buyuklar, ulug'lar nimalar deyishgan? «Ochko'z do'stdan nari yur», deydi Qobus, chunki bunday soxta do'stda hasad ko'proq bo'ladi, deb uqtiradi u.

- Qadahdosh do'st qadahingga do'st bo'ladi.
- Davlatingga do'st bo'lgan, boshingga tashvish tushgan zahoti sotib ketadi.
- Har lahzada o'zgaruvchi do'stdan soyang yaxshiroq.
- Qiziqqon do'stga ham umid bog'lab bo'lmaydi.
- Aldamchining do'stligi bo'ri bilan itning ittifoqiga o'xshaydi. Bu ittifoq bitta suyak tufayli barbod bo'ladi.

Bu so'zlarni o'qib, do'st topish qiyin ekan, deb o'ylashning mumkin, lekin aslo unday emas: dunyo chin do'stlik poydevori ustiga qurilgan. Oyga qara, u insonga yoki ona yerga bo'lgan do'stligini buzdimi? Quyosh-chi? Yulduzlar-chi? Fasllar va bahor hech zamonda odamni, tuproqni, mavjudotni aldadimi? Hayotda ham shunday do'stlar bor. Agar ularni topa bilsang, quyoshning eng foydali nurlari, oyning tanga yoqar yog'dulari, tuproqning eng shirin mevalari senga huzur va malohat bag'ishlaydi. Zero, yaxshi do'st tuganmas hazinadir.

Allomalarning do'st tanlay bilish kerak, degan gaplarini ham unutma!

O'G'LINI URISHMADI



Bahodir to'rtinchi sinfda o'qiydi. Onasi Gulnora opa maktabda o'qituvchi. U mehribon, bolalarni ko'nglini qanday qilib olishni biladi. Shuning uchun ham o'quvchilar u kishini yaxshi ko'rishadi. Bayramlarda o'quvchilar Gulnora opani tabriklab, har xil tabriknomalar sovg'a qilishadi. 8-Mart kuni har galgidek Gulnora opaning qo'llari ajoyib sovg'alar bilan to'lib ketdi. Ular ichida juda chiroyli, odam kayfiyatini ko'taradigan bir ajoyib guldon ham bor edi. Gulnora opaga guldon yoqdi va bolajonlardan minnatdor bo'ldi.

Guldon juda bejirim, naqshlari ko'rgan odamni hang-u mang qiladigan darajada ajoyib va g'aroyib edi. Unga: – «Bayramingiz muborak bo'lsin, Gulnora opa, o'quvchilaringiz», deb yozilgandi. Gulnora opa ishdan charchab kelganidan so'ng, barcha sovg'alarni bir yerga qo'ydi. Shu payt o'g'li Bahodir kelib, onasini tabriklab, gullar sovg'a qildi. Gulnora opa o'g'lidan mamnun bo'lib: «O'g'lim, men sendan sovg'a emas, balki faqatgina yaxshi o'qishingni istayman, a'lo baholaringni o'zi menga katta sovg'a», dedi. Gulnora opa eshikka chiqqanida, Bahodir sovg'alar ichida haligi guldonni ko'rib qoldi. Uni qo'lga olib, rosa tomosha qildi-da, havas bilan televizor ustiga qo'yib qo'ydi. Nazarida guldon yanayam yashnab ketgandek edi. Onasiga sovg'a qilingan gullardan soldi-yu, guldonni bexosdan tushirib yubordi. Bahodir qo'rqib ketdi. Shu payt onasi kelib qoldi. Singan guldonni ko'rgan Gulnora opaning rosa jahli chiqdi: «Voy, nima qilib qo'yding, bolam», dedi alam bilan.

Bahodir tilini yutib yuborgandek nafasi ichiga tushib qoldi. Birpasdan so'ng, qo'rqibgina: – Ha, oyijon, bilmasdan sindirib qo'ydim, meni kechiring, – dedi.

Lekin Bahodir o'zini oqlashga sira urinmadi. Mehribon onajonisi esa o'g'lini urishmadi...

Bolalar, nega Gulnora opa o'g'lini urishmadi?

Maysara NEKMUHAMMEDOVA,
Toshkent shahar, Yunusobod tumanidagi
259-maktabning 6-«A» sinf o'quvchisi

Aziz
Muharramxon!
Seni otang
To'ychi
Jo'raqulov,
onang
Nilufarxonlar
tug'ilgan kuning
bilan
tabriklashadi.



Muassislar:

O'zbekiston matbuot va axborot agentligi,
O'zbekiston Respublikasi Xalq ta'limi vazirligi,
«KAMOLOT» yoshlar ijtimoiy harakati Markaziy Kengashi,
«SOG'LOM AVLOD UCHUN» hukumatga qarashli bo'lmagan xalqaro xayriya jamg'armasi.

BOSH MUHARRIR:
To'lqin HAYITOV

Dizayner va sahifalovchi:
Fazliddin SHOYODGOROV
Navbatchi:
Sayyora JO'RAYEVA

Gazeta
O'zbekiston matbuot va axborot agentligida
0208-raqam bilan 2007-yil 2-fevralda ro'yxatdan o'tgan.

TAHRIR HAY'ATI:
Turobjon JO'RAYEV,
Dilbar ALIMJONOVA,
Qahramon QURANBOYEV,
Jabbor RAZZOQOV
(«O'zbekiston» NMIU Bosh muharriri o'rinbosari),
Dilmurod RAHMATILAYEV,
Dilshoda DADAJONOVA,
Feruz JALILOVA
(Bosh muharriri o'rinbosari),
Sobirjon SHARIPOV,
Ergashvoy SARIQOV.

Manzillimiz:
700129,
Toshkent shahri,
Navoiy ko'chasi, 30-uy.
Obuna indeksi: 198.
e-mail: tong1924@mail.ru
Tel: 144-27-25, 144-63-08
Tel./faks: (99871) 144-38-10

Rassomlar:
Nodira MIRZAYEVA,
Feruz MATYOQUBOV

«O'zbekiston» nashriyot-matbaa ijodiy uyida chop etildi.
Haftaning dushanba kuni chiqadi.
Shakli A-3,
2 bosma taboq.

Adadi - 58114
Buyurtma N: J 4781